

考工典第二百四十六卷

箕帚部彙考

禮記 曲禮

凡爲長者養之禮必加帚於箕上

注謂初執而往時也弟子職曰執箕膺搗厥中有帚膺疏前

也搗箕舌也言執箕之禮以箕舌嚮尊而帚置於箕中箕是棄物之器故不持嚮尊也

以袂拘而退其塵不及長者

注謂埽時也以袂擁帚之前埽而卻行之

以箕自鄉而扱之

注謂收糞時也箕去棄物以嚮尊者則不恭

學記

夏弓之子必學爲箕

疏

箕柳箕也善爲弓之家使榦角橈屈調和成弓其子弟亦觀其父兄世業

學取柳條和軟橈之成箕也

方言 箕

箕陳魏宋楚之間謂之籬

炊箕

炊箕謂之縮或謂之箕或謂之匣

音旋

漉米箕也江東呼淅籤

說文 簞

簞大箕也

筍譜 拂雲箒

竹出廬山莖大如指竹杪細葉密翠如箒彼人採爲方物贈人謂之拂雲箒

事物原始 箕

事始曰漉飯器也秦以民頭數斂穀以箕受之故云頭會箕斂去穀之糠粃者名曰簸箕自神農氏始詩云或簸或揚是也

箒


世本曰少康作箕箒以掃塵穢之始

農政全書

箕

圖


箕圖考



箕簸箕也說文云簸揚米去糠也莊子曰箕之簸物雖去麤留精然要其終皆有所除是也然北人用柳南人用竹其制不同用則一也詩云哆兮侈兮成是南箕箕四星二星爲踵二星爲舌哆侈謂踵已大而舌又廣也又維南有箕載翕其舌故箕皆有舌易播物也諺云箕星好風謂主簸揚農家所以資其用也

帚

圖



帚圖考

帚今作帚又謂之簣集韻云少康作箕帚其用有二一則編草爲之潔除室內制則扁短謂之條帚一則束篠爲之擁掃庭院制則叢長謂之掃帚又有種生掃帚一科可作一帚謂之獨掃農家尤宜種之以備場圃間用也

颶 籃 圖




颶籃圖考

颶籃颶集韻謂風飛也籃形如簸箕而小前有木舌後有竹柄農夫收穫之後場圃之間所蹂禾穗糠粃相雜執此簾而向風擲之乃得淨穀不待車扇又勝箕簸田家便之

篋

圖

篋圖考



篋漉米器說文淞篋也又云漉米藪又炊篋也廣雅曰淞蓑匣篋方言云炊篋謂之縮或謂之篋或謂之匣

江東呼爲淞篋也

蓋今炊米日所用者簞飯簞也說文陳留謂飯帚曰簞從竹梢聲一曰飯器容五

升今人亦呼飯簞爲簞簞南曰簞北曰簞南方用竹北方用柳皆漉米器或盛飯所以供造酒食農家所先雖南北名制不同而其用則一故附類之

本草綱目 箕箒舌釋名

李時珍曰箕揚之箕也南人用竹北人用杞柳爲之

主治

李時珍曰重舌出涎燒研酒服一錢又主月水不斷

附方

催生箕淋水一盞飲數口

集元方

弊帚釋名

李時珍曰許慎說文云帚從手持巾以掃除也竹帚曰箒凡竹枝荆苕黍稷芰蒲芒草落帚之類皆可爲帚也

主治

李時珍曰白駁癩風燒灰入藥

陳藏器曰人面生白駁以月食夜和諸藥燒灰苦酒調傅之

附方

白駁風弊帚弊帛履底甌帶脯腊蟬頸蛇皮等分以月食時合燒爲末酒服方寸七日三服仍以醇醋和塗之忌食發風物此乃徐王方也

古今錄驗方

身面疣目每月望子時以禿帚掃疣目上三七

遍

聖惠方

箕帚部藝文一

箕銘

漢李尤

神農植穀以養蒸民箕主簸揚糠粃交陳

帚銘

明方孝孺

地之垢治之以帚心之垢不思其道汝居空潔兮於汝何有

箕帚部藝文二

詩

賦若帚

宋謝道人

掃此圖潔淨愈掃愈不淨欲要掃教淨放下若帚柄

箕帚部紀事

吳越春秋越王入臣於吳見夫差稽首再拜曰東海賤臣句踐抵罪邊境大王赦其深辜使執箕帚誠蒙厚恩得保須臾之命不勝仰感俯愧夫差遂令駕車養馬置於石室之中越王服犢鼻著樵頭夫人衣無緣之裳施左關之襦夫斫劉養馬妻給水除糞灑掃三年面無恨色

史記張儀傳儀說楚王曰秦與楚固形親之國也大王誠能聽臣臣請以秦女爲大王箕帚之妾

孟子傳鄒衍如燕昭王擁彗先驅請列弟子之座而受業

注

索隱曰彗帚也

漢書高祖本紀三月上歸櫟陽五日一朝太公太公家令說太公曰皇帝雖子人主也太公雖父人臣也奈何令人主拜人臣如此則威重不行後上朝太公太公擁篲迎門卻行上大驚下扶太公公曰帝人主奈何以我亂天下法

注

師古曰篲者所以埽也

晉書庾袞傳袞孤兒女曰芳將嫁美服既具袞乃刈荆荊爲箕帚召諸子集之於堂男女以班命芳曰芳乎汝少孤汝逸汝豫不汝疵瑕今汝適人將事舅姑灑埽庭內婦之道也故賜汝此匪器之爲美欲溫恭朝夕雖休勿休也

苻堅載記王猛字景略少貧賤以鬻舂爲業嘗舂於洛陽乃有一人貴買其舂而云無直自言家

去此無遠可隨我取直猛利其貴而從之行不覺遠忽至深見一父老鬚髮皓然踞胡牀而坐左右十許人有一人引猛進拜之父老曰王公何緣拜也乃十倍償畚直遣人送之猛既出顧視乃嵩高山也

南齊書劉休傳宋明帝憎婦人妬休妻王氏妬帝聞之令休於宅後開小店使王氏親賣掃帚皂莢以辱之

南史王鎮之傳鎮之從孫思遠立身簡潔諸客有詣己者覘知衣服垢穢方便不前形儀新楚乃與促膝雖然及去之後猶令二人交帚拂其坐處

雲仙雜記王維居輞川性好潔地不容浮塵日有十數掃帚者使兩童專掌縛帚而有時不給

南唐近事陶穀學士奉使恃上國勢下視江左辭色毅然不可犯韓熙載命妓秦弱蘭詐爲驛卒女每日弊衣持帚埽地陶悅之與狎因贈一詞名風光好云好因緣惡因緣只得郵亭一夜眠別神仙琵琶撥盡相思調知音少時得鸞膠續斷絃是何年明日後主設宴陶辭色如前乃命弱蘭歌此詞勸酒陶大沮卽日北歸

茅亭客話雍道者名法志東川人性慕清虛常供養一石老君及誦天蓬咒枕中經因夢一道士云雍法志吾於汝處求錢三千貫文法志辭貧道士取石像前櫻帚云但有患者備此帚掃之卽愈言訖而覺因昇鄉里有患者將帚掃之應手立愈四遠患者雲集有資金守門經旬未獲掃者所得錢帛並送修造所逾百日因悅一婦人潛出不歸患人稍稍不集至是年冬再來掃病無應自慚而遁因詰其修造掌籍者錢僅三千餘貫正符夢中之數爾

東軒筆錄秦州徐二公者異人也亦不知其何許人日持一帚以掃神祠佛殿未嘗與人言有問則不對而走忽發一言卽應禍福

輟耕錄至正辛卯夏松江普照寺僧舍一弊帚開花

明外史瞿俊傳俊遷廣東按察副使黎人故時出寇掠俊戒約羣吏修軍政遂誓服不敢出常見市帚者呼入分給諸僚有一僚倍給之問其故曰君庭多穢耳

寓圃雜記鄉先生尤安禮字文度歸吳有一子先生命之灑掃執簞以問曰大人地從何處掃起可見其家謙厚之風也

箕帚部雜錄

賈誼陳政事疏秦人母取箕帚立而諄語

荊州記天門山角上各一竹倒垂拂拭謂之天帚

雜五行書常以正月三日買箕四枚懸堂上四壁令人治生田蠶萬倍錢財自入

墨莊漫錄孔雀毛著龍腦則相綴禁中以翠尾作帚每幸諸閣擲龍腦以辟穢過則以翠尾掃之皆聚無有遺者亦若磁石引針琥珀拾芥物類相感也

清暑筆談暇日過僧寺入淨室見僧掃地次曰淨室何須著掃僧拈起帚柄近前曰土上加灰余曰
棒不著便好與二十帚柄去

春雨雜述古人以帚濡水學書於砌或書於几几石皆陷

箕帚部外編

異苑義熙中東海徐氏婢蘭忽患羸黃而拂拭異常共伺察之見掃帚從壁角來趨婢牀乃取而焚之婢卽平復

西域志佛筭在月支國長三尺許似孔雀尾也


酉陽雜俎上都僧太瓊者能講仁王經開元初講於奉化縣京遙村遂止村寺經兩夏於一日持鉢將上堂闔門之次有物墜檐前時天纔辨色僧就視之乃一初生兒其襁褓甚新僧驚異遂袖之將乞村人行五六里覺袖中輕探之乃一弊筭也

雜農器部彙考

農政全書

攪

圖




耨圖考

耨槌塊器說文云耨摩出器管灼曰耨椎塊椎也呂氏春秋曰鋤耨白挺耨椎也管子云一農之事必有一錙一椎然後成爲農今田家所制無齒杷首如木椎柄長四尺可以平田疇擊塊壤又謂木斫卽此耨也

勞

圖




勞圖考

勞無齒耜也但耜槌之間用條木編之以摩田也耕者隨耕隨勞又看乾濕何如但務使田平而土潤與耜頗異耜有渠疏之義勞有蓋摩之功也齊民要術曰春耕尋手勞秋耕待白背勞注云春多風不卽勞則致地虛燥秋田擦實速勞則恐致地硬又曰耕欲廉勞欲再今亦名勞曰摩又名蓋凡已耕耜欲受種之地非勞不可

耜

車

圖



耬車圖考

耬車下種器也通俗文曰覆種曰耬一云耬犁其金似鎌而小魏志略曰皇甫隆爲燉煌太守民不知耕隆乃教民作耬犁省力過半得穀加五崔寔論曰漢武帝以趙過爲搜粟都尉教民耕植其法三型共一牛一人將之下種輓耬皆取備焉日種一頃今三輔猶賴其利自注云按三型共一牛若今三脚耬矣然耬之制不一有獨脚兩脚三脚之異若今燕趙齊魯之間多有兩脚耬關以西有四脚耬但添一牛功又倍之夫耬中土皆用之他方或未經見恐難成造其制兩柄上彎高可三尺兩足中虛闊合一壘橫枕四匝中置耬斗其所盛種粒各下通足竅仍旁挾兩轅可容一牛用一人牽旁一人執耬且行且搖種乃自下此耬種之體用今特圖錄近有剗制下糞耬種於耬斗後另置篩過細糞或拌蠶沙耨時隨種而下覆於種上尤巧便也今又名曰種時曰耩子曰耬犁習俗所呼不同用則一也